

uestro vezino, que quando algunos omes de uestro lugar pusiessen querella unos dotros et la querella fuesse mostrada a los alcaldes de la villa, que mandasse que si amas las partes se aviniessen entre si del dia que la querella fuesse mostrada a los alcaldes fara X dias, que lo podiessen fazer segund que lo yo otorgue al conçeio de Murçia. Et yo por uos fazer meçet tengolo por bien et mando que quando querella ouieren unos vezinos dotros en uestro logar et amas las partes se quisieren avenir, que lo puedan fazer assi como dicho es, segund que lo yo otorgue al conçeio de Murçia por mio priuilegio.

Dada en Seuillia, el rey la mando martes XXVIII dias de agosto, era de mil et CCC et seyç annos. Yo Pedro Gomeç, escriuano de Garçia Domingueç, notario del rey en la Andaluzia, la fiz escriuir.

LXXXIX

**1268-IX-23, Sevilla.—Alfonso X a los partidores de Lorca.
Orden de que dividieran el agua por días y por tiempos.
(A. M. Lorca, perg. n.º 13)**

Don Alffonso, por la gracia de Dios rey de Castiella, de Toledo, de Leon, de Gallizia, de Seuilla, de Cordoua, de Murcia, de Jahen et del Algarue, a uos, don Pedro Ponçe, comendador mayor del alcaçar de Lorca, et a uos [don Garcia] Martinez, dean de Cartagena, mio clerigo, et a uos, Guillen Perez de Pina, et a uos, Miguel Perez, alguazil de Lorca, et a uos, Domingo Perez, repostero mayor de la reyna, et a uos, Beltran de Villanueua, mio escriuano, mios partidores de Lorca, salud commo a aquellos que quiero bien et en que fio. Sepades que el conçeio de Lorca se me embiaron querellar que los sennores de los donadios tienen toda la agua que la non dexan salir de sus huertas afuera pora pan nin pora otra cosa ninguna, [et por esso] que pierden los panes ca []. Et si asi es so ende marauillado. Ende uos ruego et uos mando que uayades y et que ueades en qual guisa es, et partidles la agua comunalmente por dias et por [tiempos], de guisa que ninguna contienda non aya daqui adelante sobresta razon Et non fagades end al et fazer [mie en] ello seruicio.

Dada en Seuilla, el rey la mando domingo XXIII dias de septiembre, era de mill et CCC et VI annos. Yo Pedro Gonçaluez, escriuano de Garcia Dominguez, notario del rey en la Andaluzia, la fiz escreuir.

